



XIRHAMBO XA KU BOXIWA KA MAVITO YA MUAVANYISINKULU LOYI A LANDZELAKA WA RHIPHABULIKI YA AFRIKA-DZONGA

Manghenelo

1. Theme ya Muavanyisinkulu wa nkarhi wa sweswi, Muavanyisi Mogoeng Mogoeng, yi fika emakumu hi siku ra 11 Nhlangua 2021
2. Xiyenge xa 174(3) xa Vumbiwa xi havexerisa Phuresidente matimba ya ku thola Muavanyisinkulu loyi a landzelaka endzhaku ka ku pfumelelana na Khomixini ya Vukorhokeri bya Vuavanyisi na varhangeri va mavandla ya tipolitiki lama yimeriweke eka Huvo ya Rixaka.
3. Hi ku landza Vumbiwa, Muavanyisinkulu i “nhloko ya vuavanyisi naswona u tirha vutihlamuleri ehenhla ka ku tumbuluxiwa na ku vekiwa tihlo ka mitolovelo na mipimo eka ku tirhiwa ka mitirho ya vuavanyisi ya tikhoto hinkwato”.
4. Muavanyisinkulu u na vutihlamuleri bya ku rhangela thiyori ya nawu tanihiloko a angamela mafambiselo ya Khoto ya Vumbiwa. U tlhela a va na vutihlamuleri bya ku veka na ku angamela nhlayiso wa mipimo ya ku tirhiwa ka mitirho ya vuavanyisi ya tikhoto ta ka hina, na ku va mutshamaxitulu wa Khomixini ya Vukorhokeri bya Vuavanyisi.

Phurosese yo pfuleka leyi khumbaka vaaki

5. Ku kondletela nkavuciva na ku kotisa vutekaxiave bya vaaki, Phuresidente Ramaphosa u tekile xiboho xa leswaku vanhu va Afrika-Dzonga va fanele ku rhambiwa ku teka xiave eka ku hlawula Muavanyisinkulu loyi a landzelaka.
6. Hikokwalaho, Phuresidente u rhamba ku boxiwa ka mavito ka vayimelakulangwa va Muavanyisinkulu. Ha tshemba leswaku Muavanyisinkulu u fanele a kombiwa ku va a hlengeleta nxiximo na nseketelo wa swirho swa phurofexini leyi a humaka eka yona, xikan'we na kusuka eka vaaki hi ku angarhela.
7. Ku boxiwa ka mavito swi fanele ku vula swivangelo leswaku hikwalahokayini muboxiwavito a voniwa a ringanerile ku va Muavanyisinkulu wa hina loyi a landzelaka, ntokoto wa yena havumbirhi tanihi mutirhi wa nawu, ku katsa na ntokoto wihi kumbe wihi tanihi muavanyisi, na tanihi murhangeri.
8. Hi ku engetela, ku boxiwa ka mavito swi fanele ku fambisana na ku amukeriwa na ku seketeriwa hi mpimohansi wa huvo ya xiphurofexinali yin'we ya vatirhi va nawu, nhlanguano lowu nga riki wa mfumo lowu tirhaka eka ndzima ya timfanelo ta ximunhu, kumbe ndzima ya nawu yin'wana.

9. Nxaxamelo wa vaboxiwamavito wu ta endliwa wu tiveka eka vaaki.

Phanele yo endla nxaxamelo wo koma wa vaboxiwamavito

10. Endzhaku ka ku kuma mavito lama boxiweke, phanele ya vanhu vo xiximeka lava nga na ntokoto lowu fambelanaka va ta endla nxaxamelo wo koma exikarhi ka vayimelakulangwa va3 na va 5. Phanele leyi yi ta teka xiboho hilaha yi nga ta hlengeleta nxaxamelo wo koma kahle hakona hi ndlela yo pfuleka, ya nkavuciva na ku va yo hatlisa.
11. Phanele leyi yi ta vumbiwa hi khale ka Muavanyisi wa Khoto ya Matiko ya Misava ya Vululami tlhelo Khomixinarankulu wa Timfanelo ta Ximunhu wa Vun'we bya Tinxaka, Navi Pillay tanihi mutshamaxitulu, Holobye wa Vululami na Vukorhokeri bya Makhotsa, Ronald Lamola, khale ka Holobye wa Vululami Jeff Radebe, khale ka Musirheleri wa Vaaki Gqweta Thuli Madonsela, mutshamaxitulukulobye wa Khansele ya AIDS ya Rixaka ya Afrika-Dzonga, Mnn Mmapaseka Steve Letsike, na Phurofesa ya Nawu eka Xikolo xa Nawu xa Yunivhesiti ya Howard, Phurofesa Ziyad Motala.
12. Phuresidente u ta teka xiboho leswaku i vayimelakulangwa vahi kusuka eka nxaxamelo wo koma lowu a nyikiweke hi phanele ya vanhu vo xiximeka ku va kongomisa eka Khomixini ya Vukorhokeri bya Vuavanyisi na varhangeri va mavandla ya tipolitiki lava yimeriweke eka Huvo ya Rixaka leswaku va nyika mavonelo.
13. Ku boxiwa ka mavito hinkwako na tidokhumente to seketela swi boheka ku rhumeriwa eka **angeline@presidency.gov.za** na **cjnominations@gcis.gov.za** ku nga si hundza siku ra 1 Nhlangua 2021. Swi boheka ku katsa:
- 13.1. Papila ro boxa vito, ku katsa na vuxokoxoko bya vutihlanganisi bya muboxavito;
 - 13.2. Mpfumelo wa muboxiwavito wa ku boxiwa ka vito na vuxokoxoko bya yena bya vutihlanganisi;
 - 13.3. Mapapila yo seketela ya ku boxiwa ka vito, ku katsa na vuxokoxoko bya vutihlanganisi bya vanhu kumbe mavandla lama seketelaka ku boxiwa loku ka vito, ku katsa na mpimohansi wa papila rin'we ra nseketelo kusuka eka huvo ya xiphurofexinali ya vatirhi va nawu, nhlanguano lowu nga riki wa mfumo lowu tirhaka eka ndzima ya timfanelo ta ximunhu, kumbe ndzima ya nawu yin'wana; na
 - 13.4. Tidokhumente to engetela tihi kumbe tihi leti munhu loyi a boxaka vito ra muyimelakulangwa wa Muavanyisinkulu a ti vonaka ti fambelana.
14. Ku boxiwa ka mavito hinkwawo na tidokhumente to seketela (handle ka vuxokoxoko bya munhu yena n'wini) swi ta endliwa swi tiveka eka vaaki eka webusayiti ya le Hofisini ya Phuresidente ku nga si hundza siku ra 4 Nhlangua 2021.
15. Mikaneto yihi kumbe yihi ya vaboxiwamavito yi ta dinga ku bumabumeriwa, hi ku tsala, na ku rhumeriwa eka adirese ya imeyili ku nga si hundza Ravuntlhanu 15 Nhlangua 2021.
16. Phanele yi ta laveka leswaku yi vikela Phuresidente ku nga si hundza Ravuntlhanu 29 Nhlangua 2021. Endzhakukaswona u ta tihlanganisa na Khomixini ya Vukorhokeri bya Vuavanyisi na varhangeri va mavandla ya tipolitiki lama yimeriweke eka Huvo ya Rixaka.